



ACTA DO PLENO DA CORPORACIÓN

SESIÓN ORDINARIA DO 10 DE MAIO DE 2018.

ASISTENTES:

Alcalde- Presidente:

José Luis Oujo Pouso (PP)

Concelleiros:

María José Maneiro Quintáns (PP)

José Manuel Deán Pouso (PP)

Juan Jesús Pérez Santos (PP)

M^a Magdalena Pérez Millares (PP)

Antonio Romero Ribeiro (PP)

Joaquín García García (PP)

Josefa M^a Hermo García (PSdG- PSOE)

Luis García Gaciño (PSdG- PSOE)

M^a Asunción Torres Parada (Portodos)

José Ángel Lorenzo Vila (Portodos)

M^a Ánxela Franco Pouso (BNG)

David Barrio Alonso (BNG)

Secretario:

José Manuel González García.

Na localidade de Porto do Son (A Coruña), sendo as **20:05 horas** do día **10 de maio de 2018**, no Salón de Actos da Antiga Casa Consistorial, reúne o Pleno da Corporación Municipal en **sesión ordinaria**, previamente convocada, baixo a presidencia do Sr. Alcalde- Presidente, D. José Luis Oujo Pouso, coa asistencia dos Sres. concelleiros que se relacionan á marxe.

Non asiste D^a. M^a Asunción Torres Parada (Portodos).

A Corporación está asistida polo secretario da Corporación, D. José Manuel González García, que dá fe do acto.

Tamén asiste a interventora do concello, D^a. M^a Mar Lirola Delgado.

Unha vez verificada polo secretario a válida constitución do Pleno, dado que se cumpre a asistencia mínima dun terzo do número legal de membros da Corporación, o Alcalde- Presidente abre a sesión.

De seguido o Alcalde- Presidente procede á deliberación e votación dos asuntos incluídos na **ORDE DO DÍA:**

A) PARTE RESOLUTIVA.

1.- Aprobación de actas de sesíons anteriores.

2.- Aprobación do recoñecemento extrajudicial de crédito 13/2018.

- 3.- Proposición do grupo municipal do BNG en apoio á lingua galega.
- 4.- Proposición do grupo municipal do BNG para o mantemento de pensións dignas para os galegos
- 5.- Mocións urxentes.

B) PARTE DE CONTROL.

- 6.- Dación de conta da aprobación da Liquidación dos Orzamentos Xerais do ano 2017.
- 7.- Dación de conta da delegación na Xunta de Goberno Local de competencias da Alcaldía.
- 8.- Dación de conta do informe de morosidade e sobre o período medio de pago a provedores correspondente ao 1º trimestre de 2018.
- 9.- Dación de conta de decretos da Alcaldía e actas da Xunta de Goberno Local.
- 10.- Rogos e preguntas.

1. APROBACIÓN DE ACTAS DE SESIÓNS ANTERIORES.

O Sr. Alcalde- Presidente pregunta se os concelleiros queren fazer algunha observación ás actas das sesiós extraordinaria do 19/02/2018, ordinaria do 09/03/2018 e extraordinaria do 26/03/2018.

Non habendo intervencións, somete a votación a súa aprobación.

O Pleno Corporativo, trala **votación ordinaria e por oito (8) votos a favor (7 PP+ 1 Portodos)** e con **catro (4) abstencións (2 PSdG- PSOE+ 2 BNG)**, polo tanto co **quórum de maioría absoluta**, sendo trece (13) o número legal de membros da Corporación, **APROBA as actas da sesión extraordinaria do 19/02/2018, da sesión ordinaria do 09/03/2018 e da sesión extraordinaria e urgente do 26/03/2018**.

2. APROBACIÓN DO RECOÑECIMENTO EXTRAXUDICIAL DE CRÉDITO 13/2018.

O Sr. secretario dá lectura á proposta da Alcaldía, que é do seguinte teor literal:

"Vistos os xustificantes de gasto indicados.

Nº de Entrada	Fecha	Nº de Documento	Fecha Dto.	Importe Total	Tercero	Nombre	Texto Explicativo	Programa	Economica
F/2018/650	02/03/2018	GAL0020318F00047	02/03/2018	1709.13	A66141185	VIAQUA GESTION INTEGRAL DE	POLO ALUGUER E RETIRADA DE CONTENEDOR PARA RESIDUOS DE	160	20800



						AGUAS DE GALICIA, S.A.U.	DESBASTE DAS DEPURADORAS, OUTUBRO E NOVEMBRO DE 2016, FEBREIRO, MARZO E MAIO DE 2017.		
--	--	--	--	--	--	-----------------------------	---	--	--

Visto o informe da Intervención Municipal.

Vista a necesidade de proceder á aprobación dos xustificantes de gasto, dado que se trata de servizos prestados efectivamente e en virtude do principio de enriquecementoinxusto.

Polo presente,

PROPOÑO Ó PLENO DA CORPORACIÓN:

PRIMEIRO: Aprobar por recoñecemento extraxudicial o xustificante de gasto relacionado, con imputación da autorización, disposición e liquidación do gasto ás aplicacións orzamentarias indicadas.

SEGUNDO: Dar conta do presente acordo á intervención e tesourería municipal.

Porto do Son, a 4 de maio de 2018.

O ALCALDE
ASDO.-JOSÉ LUIS OUJO POUSO"

Os voceiros dos grupos municipais do PSdG- PSOE e Portodos non fan uso da súa quenda de palabra.

Dª. María Ánxela Franco Pouso comeza sinalando que, de novo, se trae un recoñecemento extraxudicial de crédito ao Pleno; agora por importe de 1.709,13 euros e correspondente ás anualidades 2016 e 2017, pero neste caso non vale a escusa da data de rexistro da factura, pois é do 02/03/2018 e despois dessa data houbo sesións nas que se puido aprobar.

A voceira nacionalista indica que están agardando a que o Sr. Alcalde presente a listaxe dos recoñecementos extraxudiciais de crédito que tramitou o goberno de ano e medio de duración do que o BNG formou parte.

Remata a súa intervención preguntando se o concello lle cobrou algo á empresa que factura por terlle arrendado unha mesa e un ordenador a súa traballadora que está nas oficinas xerais do concello.

Dª. María José Maneiro Quintáns explica que non se trata dunha factura de 2014, senón que debe ser unha factura de atrasos por traballos realizados no ano 2014, aínda que cre que se trata dun erro da empresa.

Dª. María Ánxela Franco Pouso apunta que non entende que se trate dun erro da empresa nin que, sendo gastos repetidos no tempo, non se contemple crédito orzamentario para atendelos. Tamén di que lle chama a atención a factura por subministración de material eléctrico e pregunta quen o instala.

Dª. María José Maneiro Quintáns cualifica de absurdos os argumentos da Sra. Franco Pouso pois a factura do recoñecemento extraxudicial de crédito, aínda que se presentou o 02/03/2018,

refírese a gastos de anos anteriores. Engade que, se lles tivese dado tempo a tramitala, parvos serían de non tela incluído na orde do día dunha sesión anterior.

Dª. María Ánxela Franco Pouso apunta que o de “parvos” é algo que di a Sra. Maneiro Quintáns e sinala que foi o Sr. Alcalde quen dixo que ía traer unha listaxe dos recoñecementos extraxudiciais de crédito tramitados polo goberno do que formou parte o BNG. Remata instando á voceira do grupo municipal do PP a que lle conteste e non se esconda no seu argumentario.

Non habendo intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por sete (7) votos a favor (7 PP) e con cinco (5) abstencíóns (2 PSdG- PSOE+ 1 Portodos+ 2 BNG)**, polo tanto co **quorum da mayoría absoluta**, sendo **trece (13)** o número legal de membros da Corporación, **APROBA a proposta** nos seus propios termos.

3. PROPOSICIÓN DO GRUPO MUNICIPAL DO BNG EN APOIO Á LINGUA GALEGA.

D. David Barrio Alonso expón que o documento aborda a situación da lingua galega, o “decreto do plurilingüismo” e a redución de recursos para a promoción da lingua galega levada a cabo polo goberno do PP e os ataques que sofre por este partido. De seguido, dá lectura á proposición, que é do seguinte teor literal:

“EXPOSICIÓN DE MOTIVOS

Faise palpábel e evidente que o proceso de normalización da lingua galega realizado até o día de hoxe polas administracións públicas foi insuficiente para garantir o dereito a vivir libremente na lingua propia de Galiza. O respecto á legalidade vixente -Estatuto de Autonomía e Lei de normalización lingüística, Carta europea de linguas rexionais ou minoritarias- e a implementación de políticas que favorezan o uso do galego e aumento do número de galegofalantes semella non ir na dirección correcta e así o demostran os estudos realizados polo Consello da Cultura Galega (CCG) e a Real Academia Galega (RAG).

As políticas promovidas polo Partido Popular lonxe de contribuír o uso da lingua galega, procuraron todo o contrario, tendo no Decreto do plurilingüismo o ariete co que derrubar calquera avance. Este decreto prohíbe dar certas materias no idioma propio do país, furtándolle á mocidade a posibilidade de adquirir coñecementos en galego e, polo tanto, incumprindo co mandato de garantir que o alumnado teña o mesmo nivel de competencias nas dúas linguas oficiais.

Alén do *decretazo*, o Partido Popular seguiu traballando na minorización do galego coas súas políticas de recortes eliminando a Consellaría de Cultura, reducindo drasticamente o orzamento destinado ao fomento da lingua galega (apenas supera os 6 millóns de euros cando en 2008 se destinaban 23 millóns de euros) ou subvencionando a medios de comunicación que relegan a lingua até o anecdótico mentres os medios de comunicación integralmente en galego fican sen axudas.

Asistimos a un panorama onde as persoas galegofalantes non gozamos de dereitos que nos amparen no uso do idioma día a día, resulta evidente que a pouca lexislación que pode protexernos non se aplica mentres que as máis de 500 disposicións legais que obrigan e protexen o castelán fanse cumplir rigorosamente. Resulta rechamante como é a propia Administración pública a que



encabeza os ataques á lingua, tal e como se reflicte no informe da Liña do Galego 2017 elaborado pola Mesa pola Normalización Lingüística.

No mes de abril de 2018, a Xunta de Galiza presentou un plan de dinamización da lingua galega na mocidade que pretende paliar as nefastas consecuencias que provocan as súas políticas desgaleguizadoras. Un plan que nin tan sequera lle foi presentado ás entidades que traballan na promoción do galego, mais sobre todo é unha cortina de fume para lavar as mans dos principais causantes da drástica redución do galego no ensino e no uso entre as franxas más novas da sociedade.

Fronte todo o anterior, resulta máis necesaria que nunca a mobilización social, pois está a comprobarse que os únicos avances que logra o galego son promovidos polas entidades sociais, e a resposta cidadá ante as múltiples agresións e ataques. Desde o BNG instamos á Xunta de Galiza a que abandone as súas políticas desgaleguizadoras e volva ao consenso aplicando o Plan Xeral de Normalización da Lingua Galega aprobado unanimemente no Parlamento de Galiza en 2004.

Por iso, o grupo municipal do BNG solicita do Pleno da Corporación municipal a adopción do seguinte

ACORDO

1. Apoiar as mobilizacións en defensa da lingua convocadas para o 17 de maio, con motivo da celebración do Día das Letras galegas, pola plataforma cidadá Queremos Galego.
2. Instar á Xunta de Galicia a iniciar a tramitación para a derrogación do Decreto 79/2010, do 20 de maio para o plurilingüismo no ensino non universitario de Galicia, e ao cumprimento do disposto no Plan Xeral de Normalización da Lingua Galega.
3. Instar á Xunta de Galicia a restituír o orzamento recortado durante os últimos 8 anos, incrementando as partidas dirixidas á defensa e promoción da lingua galega.

Porto do Son, 26 de abril 2018.

Asdo. Ánxela Franco Pouso”

Dª. Josefa Mª Hermo García di que o seu grupo, evidentemente, apoia a normalización lingüística e o galego como galegofalantes que son, e recorda que xa no 2013 o Tribunal Superior de Xustiza de Galicia ditou unha sentenza contra o “decreto do plurilingüismo”.

A voceira socialista sinala que o goberno galego ten a obriga de respectar a lingua galega, que forma parte do patrimonio de todos, e menciona que coa LOMCE do ministro Wert e do PP o galego pasou no ensino de ser materia troncal a de especialidade, o que significa que se reducen as horas lectivas un 50 % por non ter unha duración mínima asignada. Tamén recorda que xa no 2010 o PP rexeitou unha proposición do deputado socialista D. Francisco Cerviño para desenvolver o Plan de Normalización Lingüística.

Conclúe afirmando que, como galegofalante, vai defender a lingua por riba de todo.

D. José Ángel Lorenzo Vila di que non poden esquecerse a lingua e cultura galegas, que considera que deben fomentarse, motivo polo que expresa o seu total apoio á proposición do BNG.

Dª. María José Maneiro Quintáns sinala que desde o equipo de goberno apoian e defenden o galego e a súa promoción, pois representa un vínculo de unión, e non farán como o BNG, que usa a lingua como ferramenta de separación e semella que é quen dá os "carnés de galego". Afirma que sempre defenderán o galego.

En relación co chamado "decreto do plurilingüismo", afirma que promove o galego en situación de igualdade cos outros idiomas e, aínda que se di que prohíbe dar materias educativas en galego, non sabe onde figura esa prohibición. Engade que o que fai o decreto é distribuír as materias e, empregando o mesmo argumento que expuxo a Sra. Hermo García, resultaría que ese decreto está reducindo as materias que se imparten en castelán.

Conclúe a súa intervención manifestando que o BNG non trata de fomentar a igualdade no uso do galego senón impor un idioma único, de xeito semellante ao que acontece noutras comunidades autónomas nas que semella que se prohíbe falar castelán, e que se está tratando de crear un conflito lingüístico onde non o hai.

D. David Barrio Alonso, primeiramente agradece o apoio dos grupos do PSdG- PSOE e Portodos á proposición do BNG e, de seguido, afirma que o BNG non dá carné de nada e que non se lle está impedindo a ninguén escoller o idioma que prefira. Tamén afirma que non existe o bilingüismo harmónico senón que o castelán está a primarse por riba do galego.

O Sr. Barrio Alonso sinala que é certo que o galego constitúe un nexo de unión e afirma que o único mal galego é o que non se fala.

Dª. Josefa Mª Hermo García sinala que non se trata de criticar o idioma que fala cada un pero cando o Tribunal Superior de Xustiza falla contra o "decreto do plurilingüismo" e se reduce o galego a unha materia de especialidade, non parece que o goberno autonómico do PP estea pola defensa do galego. Engade que quen levou o galego aos xulgados foi o PP mentres que foi o PSdG- PSOE quen, a través dunha medida non lexislativa, propuxo a creación dunha comisión de normalización lingüística, que o PP botou abaixo.

A voceira do grupo socialista remata indicando que concorda co dito polo Sr. Barrio Alonso e que non lle parece que a acción do PP vaia á par da dos outros partidos na defensa do galego e da normalización lingüística.

Dª. María José Maneiro Quintáns non cre que o "decreto do plurilingüismo" menoscabe o galego, senón que o pon en igualdade co castelán e respecta a liberdade na elección de idioma. Tamén apunta que nas Administracións Públicas todas as publicacións e trámites administrativos se fan en galego e o uso deste idioma é xeral, polo que non cre que exista discriminación nese eido e cualifica de inquestionable o apoio das institucións ao galego.

En relación co Plan de Dinamización da Lingua Galega na Mocidade, a Sra. Maneiro Quintáns cualifica como nefasto que na proposición se diga que "trata de paliar as nefastas consecuencias das políticas desgaleguizadoras do PP" e apunta que se ese plan, no canto de ser elaborado polo PP o fose polo BNG, sería o mellor plan do mundo.

D. David Barrio Alonso menciona que a Sra. Maneiro Quintáns aludiu ao fomento do galego polas Administracións Públicas pero a realidade é que se reduciron os fondos para ese fin de 23 a 6 millóns de euros. Tamén refire que a voceira do grupo de goberno falou de imposición do galego e de ataques a quen non o usa pero non hai tales.



Remata afirmando que, cando estudaba, a metade das clases se daban en galego, mentres que agora xa non é así.

O Sr. Alcalde- Presidente intervén para sinalar que todos se coñecen e saben o idioma que falan e que non vai aceptar que veña o BNG, e menos o de Porto do Son, a dar clases de galego. Conclúe indicando que se di que o PP machuca ou prohíbe o galego pero se se incumple a lei nos centros educativos con quen haberá que falar será coa dirección.

Non habendo máis intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por cinco (5) votos a favor (2 PSdG- PSOE+1 Portodos+ 2 BNG)** e con sete (7) votos en contra (7 PP), polo tanto co quorum da mayoría absoluta, sendo trece (13) o número legal de membros da Corporación, **REXEITA a proposición.**

4. PROPOSICIÓN DO GRUPO MUNICIPAL DO BNG PARA O MANTEMENTO DE PENSIÓN DIGNAS PARA OS GALEGOS.

Dª. María Ánxela Franco Pouso dá lectura á proposición, que é do seguinte teor literal:

"EXPOSICIÓN DE MOTIVOS

As dúbidas que se están a xerar arredor da viabilidade do sistema público de pensións son interesadas para favorecer precisamente os plans privados e seguir no camiño de recorte das pensións públicas. No Bloque Nacionalista Galego, asistimos con preocupación as novas propostas que está a facer o Goberno español, como a ampliación do cómputo de cálculo a toda a vida laboral, que afondan na mesma liña. O traballo a realizar ten que ir xusto na dirección contraria, na de recuperar os dereitos eliminados nos últimos anos coa escusa da crise.

As reformas laborais promovidas, durante os anos 2010, 2011 e 2012, por gobernos do PSOE e PP respectivamente, con diferentes niveis no seu contido e importancia, afondaron na liña neoliberal de individualización e desregulación das relacións laborais. Atrasouse a idade de xubilación aos 67 anos, ampliouse a 25 o número de anos para calcular a base reguladora, adiantouse a aplicación do factor de sostibilidade ao 1 de xaneiro de 2019, atrasouse a idade de acceso á xubilación anticipada, dificultouse o acceso ao subsidio de desemprego establecendo límites económicos de miseria para ter dereito ao mesmo e atrasouse a idade de acceso dos 52 aos 55. En definitiva, medidas todas orientadas a dificultar o acceso e reducir a contía das prestacións do sistema público de protección social, ao tempo que se fomenta a súa privatización.

Estas medidas son especialmente mesquinas en Galiza. Primeiro porque temos as pensións más baixas do Estado español, e unha maior porcentaxe de pensionistas en relación á súa poboación, as pensións son o único ingreso que entra en moitos fogares, son miles os que só teñen ingresos procedentes de prestacións das que as pensións son unha parte fundamental, e segundo porque se suma a outras medidas tamén tremendalemente inxustas, como son o co-pago polos medicamentos, polas residencias, a suba do IVE, da auga, da luz, dos carburantes... Hoxe temos un empobrecemento maior d@s pensionistas, case o 60% das pensións galegas están por baixo do salario mínimo, a media está máis de 15-20 puntos por baixo da do Estado, sendo especialmente

preocupante a situación das mulleres xa que 1 de cada 4 mulleres maiores de 65 anos está por baixo do limiar da pobreza.

O debate sobre a sostibilidade do sistema de pensións públicas ven de lonxe. Desde hai anos veñen prognosticando a súa creba e promovendo os sistemas privados xestionados polos bancos. A razón é moi sinxela, por un lado o interese de recortar a administración pública, por outro a de transferir ao sistema privado a xestión dun volume de capital formidábel derivado dos fondos de pensións públicos.

Desde o comezo da década dos 90, o debate internacional sobre a reforma dos sistemas de pensións estivo dominado polas teorías xurdidas na contorna do Banco Mundial, o Fondo Monetario Internacional e a OCDE, que defenden fortes recortes nos sistemas públicos de pensións, acompañados da capitalización individual a través do sector privado.

O argumento central é que o sistema de pensións é insostíbel. As razóns que presentan son que a esperanza de vida aumenta progresivamente ao mesmo tempo que hai menos cotizantes por causa da caída da poboación activa. A partir desta idea estenden a alarma social pregoando que a longo prazo non haberá diñeiro para pagar as pensións públicas.

O obxectivo é favorecer a privatización das pensións e permitir ao capital financeiro xestionar inxentes aforros a través dos fondos de pensións privados con destino aos mercados financeiros globais.

Estamos diante dunha decisión ideolóxica onde o poder toma a decisión de atacar os dereitos dos sectores más desfavorecidos, os que están a padecer con más dureza a crise para potenciar os plans de pensións privados e drenar ainda máis cartos dos impostos de tod@s para os bancos.

O sistema de pensións público é un dos obxectivos da axenda neoliberal desde hai décadas. Estamos a falar dun calculado e continuado proceso de desmantelamento do derecho do traballo a prol da parte máis forte nas relacións laborais, a prol do capital.

Por todo o anteriormente exposto, sométese a consideración do Pleno da Corporación a adopción do Seguinte

ACORDO

1. Instar á Xunta de Galiza a dirixirse ao Goberno español para que proceda a:

- Derrogación das reformas laborais, e en especial: Real Decreto Lei 10/2010, de 16 de xuño, de medidas urgentes para a reforma do mercado laboral, a Lei 35/2010, de 17 de setembro de medidas urgentes para a reforma do mercado de traballo, Real Decreto- Lei 20/2012, do 19 de xullo, Real Decreto- lei 3/2012 de 10 de febreiro, de medidas urgentes para a reforma do mercado laboral, o Real Decreto- lei 5/2013 de 15 de marzo de medidas para favorecer a continuidade da vida laboral dos traballadores de maior idade e promover o envellecemento activo, o Real Decreto- lei 4/2013, de 22 de febreiro, de medidas de apoio ao emprendedor e de estímulo do crecemento e da creación de emprego. Así como de todas a demás normativas que as desenvolven.
- Á aprobación dunha nova lexislación laboral e social que restitúa os dereitos perdidos como consecuencia das sucesivas contrarreformas laborais que favoreza dereitos e regulacións novas que melloren as condicións de vida e de traballo e fortalezan á clase traballadora diante do capital, para favorecer a creación de emprego de calidade como mellor vía para garantir ingresos que permitan o pago das pensións.
 - Reconhecendo o dereito á xubilación ordinaria aos 65 anos.



- Estabelecer o cálculo da base reguladora polas bases de cotización dun período de quince anos da súa vida laboral a elixir pola traballadora ou traballador.
- Estabelecer o cálculo da base reguladora polas bases de cotización dun período de 15 anos da súa vida laboral.
- Estabelecer o importe da pensión mínima no equivalente ao 60% do salario medio.
- Estabelecer a actualización anual en base ao IPC.
- Eliminar as penalizacións e discriminacións no acceso á pensión das persoas empregadas a tempo parcial.
- Reclamar para Galiza a xestión da Seguridade Social, como xa contempla o Estatuto de Autonomía.
- Demandar que as empresas, con centro de traballo en Galiza paguen os impostos e as cotizacións sociais aquí.

2. Instar á Xunta de Galicia a incrementar a contía do “Fondo extraordinario, perceptores subsidios e pensións non contributivas”, de xeito que cada persoa prestataria de pensión non contributiva perciba un incremento de 100 euros mensuais na mesma.

Porto do Son, 4 de abril 2018.

Asdo. Ánxela Franco Pouso.”

Dª. Mª Ánxela Franco Pouso di que falar da mellora das pensións sen falar da regulación do mundo laboral non ten senso e que foi mérito do PP igualar a pobreza, pois agora todos somos pobres, incluso quen traballa pola indignidade dos seus salarios. Apunta que se non se mellora a calidade do emprego o PP seguirá a repicar a súa teoría de que non hai recursos para as pensións. Neste punto, afirma que non é certo que non haxa cartos para as pensións, pois si os hai para rescatar autoestradas, para os bancos ou para o mundo do capital. Conclúe indicando que os datos son terribles e que, por exemplo, hai xente que non acode á Seguridade Social por non ter cartos para as menciñas.

Dª. Josefa Mª Hermo García afirma que o PSdG- PSOE non está de acordo coa política do PP en materia de pensións e, ao respecto, vén de presentar unha moción no Parlamento de Galicia para reclamar a recuperación do poder adquisitivo dos pensionistas, demanda a derogación da Lei 23/2013, que regula o índice de sostibilidade e revalorización do sistema de pensións da Seguridade Social. Continúa detallando que mentres o goberno socialista estivo no Goberno do Estado incrementou o fondo das pensións en 67 millóns de euros, mentres que o goberno do PP, de 2012 a 2017 reduciuno en 58.700 millóns de euros.

D. José Ángel Lorenzo Vila mostra o seu acordo coas intervencións que realizaron as voceiras dos grupos nacionalista e socialista, e sinala que o goberno que non é quen de defender o sistema de pensións públicas non é digno de gobernar. Engade que todos, por riba de siglas, deben defender o sistema de pensións público pois serán pensionistas algún día.

Conclúe a súa intervención manifestando que as mobilizacións dos pensionistas foron moi numerosas e que foi unha mágoa que non houbese ningunha en Porto do Son.

Dª. María Maneiro Quintáns di que están de acordo con defender as pensións públicas e co seu incremento ano a ano, polo menos na porcentaxe do IPC, pero non cren que parte da moción teña que ver coas pensións ou favorezan o sistema existente; opina que moción pretende o desmantelamento do sistema laboral, algo co que non concordan de ningún modo e que non ten que ver coas pensións; tampouco reclamar para Galicia a xestión da Seguridade Social,

demandas parlamentarias na que o BNG quedou só, pois nin sequera os apoiou o grupo da Marea, xa que as contas non dabán e a Seguridade Social en Galicia tería déficit.

A Sra. Maneiro Quintáns sinala que na moción se verten datos incorrectos, como dicir que se trata dunha invención que o sistema de pensións corra risco, que a Seguridade Social é solvente e que só se quere favorecer aos plans de pensións privados. Ao respecto, sinala que as decisións do goberno favoreceron as pensións públicas e non aos plans de pensións privados e a proba é que non se modificou a fiscalidade destes.

Ao respecto do manifestado pola Sra. Hermo García, cualifica de alucinante a súa intervención, pois foi o PSOE quen crebou o sistema de pensións e a Seguridade Social, conxelou as pensións, reduciu o poder adquisitivo dos pensionistas e, logo de coller un sistema de pensións con superávit no ano 2008, rematou coa capacidade de autofinanciarse da Seguridade Social. Conclúe indicando que agora, para incrementar as pensións, dependen non do PSOE senón de Ciudadanos e do PNV e que, de aprobarse os Orzamentos Xerais do Estado para 2018 as pensións subirán un 1,6 % en 2018 e 2019.

Dª. María Ánxela Franco Pouso expresa o seu asombro coa intervención da Sra. Maneiro Quintáns e apunta que nas sesións se fala moito pero se escucha pouco. Tamén sinala que o BNG, cando o asiste a razón moral, non ten problema en quedar só defendendo as súas posturas.

En relación co contido da moción, a voceira do BNG explica que nesta se alude ás normas laborais pola súa incidencia nas pensións e menciona que xa hai sistemas privados de pensións nos que se dá unha cantidade mensual a cambio da vivenda.

Referíndose á intervención da Sra. Maneiro Quintáns, parécelle asombroso que dixese que o PP salvou as pensións e pregúntalle por que non mencionou que a suba das pensións foi de 15 euros en 2018 e será de 31 euros en 2019, que é ano electoral, e no 2020. Engade que é coñecido como pensan no PP sobre quen reivindica o sistema público de pensións e pregúntase se nun concello avellentado, no que saben o que cobran os pensionistas e no que se rexeitan rebaixas tributarias para as persoas en risco de exclusión social, o goberno municipal é consciente do concello no que vive.

Remata a súa intervención indicando que, se cadra, co que se gastou na "Xuntanza dos Maiores" se poderían financiar as rebaixas tributarias propostas polo BNG.

O Sr. Alcalde- Presidente intervén para dicir que a Sra. Franco Pouso non ten vergoña xa que puido dicir o que acaba de dicir na "Xuntanza dos Maiores" pero foi covarde. Engade que lle parece unha falta de respecto cara os maiores e que o ano que vén, que é ano electoral, cando acuda á "Xuntanza dos Maiores", llo recordará.

Dª. María Ánxela Franco Pouso sinala que vai á "Xuntanza dos Maiores" desde que é concelleira e que deixou de facelo o ano que detectou que se lle regalaba comida a xente que non era do concello, que é algo que a Sra. Concellera de Servizos Sociais debía controlar. Continúa explicando que este ano foi a ese evento como responsable dunha área que acaba de incrementar a axuda por hora de servizos sociais de 9 a 12 euros e que duplicou o investimento en servizos sociais no Concello de Porto do Son, que son cousas que o Sr. Alcalde non consegue cando se senta co Sr. Conselleiro de Política Social. Engade que ela nunca dirá como o Sr. Alcalde que mentres goberne haberá comida dos maiores, senón que lle dirá aos maiores que co BNG non lles faltarán nada para o día a día.



A Sra. Franco Pouso conclúe a súa intervención propoñendo que á vindeira "Xuntanza dos Maiores" non veña xente de fóra do concello nin políticos e pregúntalle ao Sr. Alcalde que foi o que trouxeron para Porto do Son os políticos do PP que acoden ao evento.

Dª. Josefa Mª Hermo García cualifica de desfachatez a intervención da Sra. Maneiro Quintáns, pois o PP concibe as pensións coma un gasto, non como un derecho, estableceu un "copagamento" nas mencíñas, sacou do catálogo da Seguridade Social medicamentos, endureceu o acceso ás pensións e deixou perder millóns de euros para promoción do emprego.

Finaliza a súa intervención dicindo que o PP tal vez aproba os Orzamentos Xerais do Estado pero non lle sairá de balde; iso non será culpa do PSOE, que só pide un diálogo que desde o PP non lle ofrecen.

O Sr. Alcalde- Presidente recorda que o PSOE no seu momento asinou un pacto de goberno con Ciudadanos.

D. José Ángel Lorenzo Vila di non entender como a Sra. Maneiro Quintáns afirma que os seus compañeiros do PP de Madrid non fomentan os plans de pensións privados. Engade que os pensionistas falaron na rúa e a súa opinión quedou clara.

Dª. María José Maneiro Quintáns sinala que está de acordo con que haxa pensións dignas pero non co que cualifica como panfleto do BNG. Tamén apunta que o BNG di que non lle importa quedar só cando o asiste a razón moral áinda que iso supoña repartir miseria.

En alusión ao exposto pola Sra. Hermo García, afirma que o PP vai crear 20 millóns de empregos, mentres que o PSOE o que fai é destruír emprego; o PP recuperou as pensións dignas, mentres que o PSOE é quen as conxela e esgota o Fondo de Garantía das Pensións.

Dª. María Ánxela Franco Pouso afirma que o PP, de crear emprego, nada; pola contra, xerou unha situación laboral deprimente na que non comen nin os pais nin os fillos e levounos a un nivel de pobreza equiparable ao de Turquía ou a India.

O Sr. Alcalde- Presidente fai uso da palabra para sinalar que quen asegurou as pensións foi o PP, péselle a quen lle pese, e que se o BNG deixase de fixarse no PP e se centrase máis en si tal vez estaría no Congreso dos Deputados e os Orzamentos Xerais do Estado negociaríanse co BNG e non co PNV.

En relación coa anterior intervención da Sra. Franco Pouso, o Sr. Alcalde- Presidente apunta que cando a voceira do BNG foi para a Deputación Provincial dixo que o facía coa intención de pechala e, despois de 3 anos, xa vai sendo hora de facelo. Conclúe indicando que os cartos que veñen da Deputación Provincial para Porto do Son son os que lle corresponden por criterios obxectivos.

Non habendo mais intervencións, o Sr. Alcalde- Presidente dá paso á votación da proposta.

En consecuencia, o Pleno Corporativo, trala **votación ordinaria e por cinco (5) votos a favor (2 PSdG- PSOE+1 Portodos+ 2 BNG)** e con **sete (7) votos en contra (7 PP)**, polo tanto co **quorum da maioría absoluta**, sendo **trece (13)** o número legal de membros da Corporación, **REXEITA a proposición.**

5. MOCIÓN URXENTES .

Dª. Josefa Mª Hermo García anuncia a presentación dunha moción urgente relativa ao castro de Baroña.

O Sr. Alcalde- Presidente dá paso á votación da urxencia e inclusión na orde do día da sesión da moción.

En consecuencia, o Pleno Corporativo, tras a **votación ordinaria e por cinco (5) votos a favor (2 PSdG- PSOE+ 1 Portodos+ 2 BNG)** e con **sete (7) votos en contra (7 PP)**, polo tanto co **quórum da mayoría absoluta**, sendo trece (13) o número legal de membros da Corporación, **REXEITA** a urxencia do asunto e a súa inclusión na orde do día.

Dª. María Ánxela Franco Pouso anuncia a presentación dunha moción urgente para instar a Augas de Galicia en relación coa EDAR de Xuño e Caamaño.

O Sr. Alcalde- Presidente dá paso á votación da urxencia e inclusión na orde do día da sesión da moción.

En consecuencia, o Pleno Corporativo, tras a **votación ordinaria e por tres (3) votos a favor (1 Portodos+ 2 BNG)**, con **dúas (2) abstencións (2 PSdG- PSOE)** e con **sete (7) votos en contra (7 PP)**, polo tanto co **quórum da mayoría absoluta**, sendo trece (13) o número legal de membros da Corporación, **REXEITA** a urxencia do asunto e a súa inclusión na orde do día.

Dª. María Ánxela Franco Pouso anuncia a presentación dunha moción urgente sobre a recuperación dos dereitos e do emprego na Administración de Xustiza.

O Sr. Alcalde- Presidente dá paso á votación da urxencia e inclusión na orde do día da sesión da moción.

En consecuencia, o Pleno Corporativo, tras a **votación ordinaria e por cinco (5) votos a favor (2 PSdG- PSOE+ 1 Portodos+ 2 BNG)** e con **sete (7) votos en contra (7 PP)**, polo tanto co **quórum da mayoría absoluta**, sendo trece (13) o número legal de membros da Corporación, **REXEITA** a urxencia do asunto e a súa inclusión na orde do día.

D. David Barrio Alonso anuncia a presentación dunha moción urgente para habilitar praías de lecer para cans en Porto do Son.

O Sr. Alcalde- Presidente adianta que o seu grupo vai votar en contra e pregunta que praías se propoñen para ese fin; engade que lle trasladarían esa cuestión aos veciños e xa serían eles os que opinasen.

D. Luis García Gaciño recorda que o grupo socialista presentou unha moción semellante o ano pasado pero o máis importante é que se cumpran as Ordenanzas municipais.

D. David Barrio Alonso explica que propoñen habilitar dúas praías para cans, unha delas urbana, a elaboración da normativa pertinente, a dotación de sinalización e a promover o cumplimento desa normativa.



O Sr. Alcalde- Presidente sinala que ve moi complicado habilitar como praia para cans unha urbana e insta ao Sr. Barrio Alonso a que presente unha moción propoñendo as praias que se habilitarían e estudaran.

D. Luis García Gaciño indica que lle corresponde ao goberno municipal que praias concretas se habilitarían para cans e que o Sr. Barrio Alonso só propón estudar a cuestión.

O Sr. Alcalde- Presidente dá paso á votación da urxencia e inclusión na orde do día da sesión da moción.

En consecuencia, o Pleno Corporativo, tras a **votación ordinaria e por cinco (5) votos a favor (2 PSdG- PSOE+ 1 Portodos+ 2 BNG)** e con **sete (7) votos en contra (7 PP)**, polo tanto co **quórum da maioría absoluta**, sendo trece (13) o número legal de membros da Corporación, **REXEITA** a urxencia do asunto e a súa inclusión na orde do día.

6. DACIÓN DE CONTA DA APROBACIÓN DA LIQUIDACIÓN DOS ORZAMENTOS XERAIS DO ANO 2017.

O Sr. Alcalde- Presidente dá conta da aprobación por decreto da Alcaldía da liquidación dos Orzamentos Xerais do concello correspondentes ao exercicio 2017.

7. DACIÓN DE CONTA DA DELEGACIÓN NA XUNTA DE GOBERNO LOCAL DE COMPETENCIAS DA ALCALDÍA.

O Sr. Alcalde- Presidente dá conta da delegación na Xunta de Goberno Local da competencia da Alcaldía para o recoñecemento e liquidación de obrigas polo procedemento de recoñecemento extraxudicial de crédito cando exista dotación de crédito orzamentario, acordada por decreto da Alcaldía núm. 269/2018, do 11 de abril.

8. DACIÓN DE CONTA DO INFORME DE MOROSIDADE E SOBRE PERÍODO MEDIO DE PAGO A PROVEORES CORRESPONDENTE AO 1º TRIMESTRE DE 2018.

O Sr. Alcalde- Presidente dá conta do informe de morosidade e sobre o período medio de pago a provedores correspondente ao 1º trimestre de 2018.

9. DACIÓN DE CONTA DOS DECRETOS DA ALCALDÍA E ACTAS DA XUNTA DE GOBERNO LOCAL.

O Sr. Alcalde- Presidente dá conta dos decretos da Alcaldía dos núms. 153/2018 ao 277/2018 e das actas da Xunta de Goberno Local do 15 de marzo, 5 e 19 de abril e 3 de maio 6 de 2018.

10. ROGOS E PREGUNTAS.

D. José Manuel Deán Pouso resposta ás preguntas formuladas na anterior sesión ordinaria do Pleno e que non foron contestadas nesa mesma sesión.

a) Preguntas de D. Luis García Gaciño:

1/ Como non se lle contestou, pregunta de novo ¿cando se van incluir no Portal de Transparencia as actas das Xuntas de Concelleiros Delegados?

Sen comentarios.

b) Preguntas de Dª. Josefa Mª Hermo García:

1/ ¿Cantas actuacións hai planificadas, pechadas ou acordadas a Concellería de Cultura coa Escola Municipal de Música e Baile segundo o regulamento aprobado no Pleno?

As actuacións de Suevia están pechadas en Ribeira o 15 de decembro, 25 de agosto en Porto do Son e faltan por pechar as datas para distintas comisión de festas. Anduriña actuará na Praza de España o 11 de agosto.

2/ ¿Que vai pasar cos parques de Carballo e co da Casa da Cultura de San Pedro de Muro e, sobre todo, cos parques de Outón, de Xuño, Queiruga e da Casa da Cultura de Caamaño, os que o equipo de goberno denomina "zona sur do concello"?

Non sabemos moi ben a que se refire, pola nosa parte seguiremos mantendo os parques infantís municipais nas mellores condicións posibles.

3/ ¿Ten pensado o equipo de goberno responder aos escritos do PSOE e aos presentados conjuntamente cos grupos políticos da oposición?

O equipo de goberno sempre responderá a todas as peticionis da oposición sempre e cando estas sexan lexítimas e dentro dos supostos legais polos que temos que rexernos.

4/ Pregúntalle ao Sr. Deán Pouso se sabe o que é un "plan cultural, e rógalle que non lle volva tomar o pelo nin a ela nin aos veciños de Xuño neste asunto, pois non é un "plan cultural" que ela e os veciños de Xuño toquen a pandeireta ou os actos en apoio da biopsia líquida.

Un Plan cultural é unha ferramenta de traballo que ten a capacidade de estruturar e organizar as actividades culturais. Si se refire ó plan cultural do Concello consiste en organizar e deseñar as distintas actividades culturais que se van a desenrolar no noso Concello.

5/ ¿Ten o Sr. Concelleiro de Cultura un plan acordado para levar actividades a todas as casas da cultura no ano 2018, excluída a Feira Celta e as festas patronais?

Temos 15 actuacións pechadas na Rede Cultural da Deputación e 5 actuacións do Programa Ler Conta moito, Novembro Cultural, exposicións itinerantes nas diferentes Casas de cultura, etc.....

c) Preguntas de D. José Ángel Lorenzo Vila:

1/ En Xío púxose unha fonte, ¿analizouse esa auga? Engade que non sabe se é potable e que, ademais, a auga pode desaparecer en calquera momento, pois procede dun manancial privado.

A auga mandouse a analizar e os non existen mananciais privados, existen autorizacións de Augas de Galicia para a captación de auga dos mananciais ca que nos contamos.

2/ O Club Ciclista Sonense solicitoulle por rexistro ao Concello de Porto do Son unha subvención e áínda non teñen comunicado ningún, ¿váiselle remitir algún comunicado explicativo ao Club Ciclista Sonense en relación coa súa solicitude ou vai aplicarse o silencio administrativo?

O club ciclista sonense ten aprobada polo pleno desta corporación unha subvención nominativa contemplada nos orzamentos do ano 2018 por importe de 1.500 euros para a realización da "Mini BTT" de Montemuíño. Ademais, poderá concorrer, ao igual que todos os clubs do Concello á convocatoria de subvencións para clubs deportivos do ano 2018, convocatoria que se publicará proximamente.

d) Preguntas de D^a. M^a Asunción Torres Parada:

1/ ¿Canto se vai arranxar a zona de Laxieles?

As obras está adxudicadas e comenzarán este mesmo mes de Maio.

2/ ¿A onde foron a parar os eucaliptos cortados nunha das ladeiras da Tarela? ¿Que destino tiveron?

Esta pregunta xa foi respuestada no anterior pleno.

3/ Os cans recollidos e gardados na nave do Loreto, ¿teñen espazos resgardarse do frío e da choiva? Se non é así, roga que se habilite un espazo no que poidan resgardarse e permanecer en liberdade mentres non aparecen os donos ou se fai cargo deles alguén.

Os cans que se recollen son depositados na nave do Loreto solo de forma provisional e por un tempo moi limitado, á espera de que aparezca o seu dono. No caso de que non aparezan son trasladados a una canceira. De todos os xeitos está prevista a construción dun espazo resguardado para tal fin.

4/ ¿Que días está aberto o Museo Marea? ¿Con que horarios? ¿Organízase desde alí algunha ruta marítima ata o castro de Baroña?

O horario de apertura do museo é de venres a domingo de 10 a 2 da mañá e de 5 a 8 da tarde durante o inverno. No verán, dende o 15 de xullo ata o 15 de setembro, o horario é de luns a domingo, de 10 a 2 da mañá e de 5,30 a 8,30 da tarde. Máis información na web do museo www.mareamuseo.com

5/ ¿Cando se vai habilitar a oficina de Correos en Portosín? Xa vai alá un ano desde que esa parroquia carece dun servizo fundamental que antes tiña, polo que roga que se faga o necesario para habilitala canto antes.

O Concello de Porto do Son xa mantivo tódalas reunións necesarias cos responsables do servizo e xa se puxo a disposición un local público e totalmente gratuito para que o servizo se preste en Portosín. Agora mesmo estamos á espera da decisión final por parte dos responsables de Correos.

6/ ¿Cando se vai colocar na Praza do Curro de Portosín a pérgola que se retirou e que a inmensa maioría dos veciños e turistas reclaman?

Estamos valorando varias alternativas e orzamentos para a súa colocación o máis pronto posible.

7/ ¿Cales foron as honras e distincións concedidas polo goberno municipal desde o ano 2011?

Nomeamento de varias rúas do concello que foron aprobadas polo Pleno e o nomeamento da Casa de Cultura de Xuño, na que non mediou ningún tipo de aprobación.

8/ ¿En que conceptos se desglosan os máis de 180.000 euros recadados polo uso da piscina?

En abonos, entradas puntuais, cursos e uso da pista de pádel.

e) Preguntas de Dª. Mª Ánxela Franco Pouso:

1/ ¿Sempre pide a leña un empregado municipal que, ademais, a leva para a súa casa no tractor do concello?

Sen comentarios.

2/ ¿Facturáronse xa as saídas de Protección Civil polas caídas de pinos á estrada xeral en Caamaño? ¿Facturáronselle á COTOP por non ter a súa franxa de seguridade limpa? ¿Cal foi o importe?.

Segundo a ordenanza municipal, non están suxeitos a esta taxa os servizos prestados no termo municipal a instancia de autoridades no exercicio dos seus cargos respectivos e por razón que atendan á orde ou á seguridades xeral, como é este o caso.

3/ ¿Entendeu que a señora que comparte despacho co Sr. Romero Ribeiro está alí traballando para unha empresa privada? ¿Saben que nome ten iso?

A empresa privada está contratada polo concello para prestar os seus servizos. A forma de contratación é un contrato por prestación de servizos, totalmente legal, con informes favorables de secretaría e intervención. ¿Suponlle isto algún problema á Sra. Franco?

5/ ¿Dixéronlle aos veciños de Caamaño que retiraron dos Orzamentos os 180.000 euros da obra de saneamento en Caamaño? ¿En que data se prevé facer a obra? ¿Por que razón ás 24 ou 48 horas do Pleno saen a licitación esas obras? ¿Tiñan ou non as autorizacións o día que se aprobou o Orzamento municipal? De ser así, queren ver esas datas.

Sra. Franco Pouso, ou fai as preguntas con un mínimo de seriedade e rigor, ou o sentimos moito pero é imposible respostarlle.

6/ ¿Por que se lles negan os informes que solicitan?

Porque non son preceptivos, non se atopan nos supostos legais nos que corresponde emitir informe de Secretaría.

7/ ¿30 prazas de aparcamento resolven o problema que crearon en Portosín co macrodeseño empedrado?

Este equipo de goberno está inmensamente satisfeito polo resultado final da obra da Praza do Curro de Portosín, que converteu unha rotonda reservada ao tráfico que invadía o espazo do viandante en unha espectacular praza, peonil, para uso e desfrute dos veciños, visitantes e da hostalería de Portosín. Lamentamos que a súa animadversión ao material autóctono de Galicia, o granito, lle impida a vostede ver esta realidade, pero como comprenderá, ese non é o noso problema. O que nos importa é que os veciños de Portosín contan con unha praza como se merecen.

En canto á zona de aparcamento, pensamos que foi todo un acerto sacar espazo aos coches na praza para que ese espazo o podamos disfrutar as persoas, e subsánase perfectamente co aparcamento lindeiro na zona portuaria. Sobre todo si temos en conta que a problemática co aparcamento limitáse a un mes do ano en época estival.

8/ ¿Hai ou non Inventario de Bens, pois o concello pagou fai uns anos 18.000 euros para facer un inventario de bens? Se existe Inventario de Bens, ¿por que se require a través do BOP a veciños de Caamaño e San Pedro de Muro a investigación de bens? ¿Explicáronlle ao dono da casa de San Pedro de Muro o que supón que teña un vial de 8 metros?

Como coñece vostede perfectamente, o Inventario de Bens municipal, que sufragou a Deputación da Coruña e non o concello como vostede afirma, non está aprobado definitivamente e polo tanto non está en vigor.

De todos os xeitos, trátase dun inventario de bens, non de camiños, polo que non atopamos relación algúns co resto da pregunta.

f) D. David Barrio Alonso fai as seguintes preguntas:

1/ ¿Hai sitio para gardar os novos vehículos do concello cando están fóra da súa actividade ordinaria?

Si se refire a garaxes municipais, temos o edificio de usos múltiples, como vostede ben sabe. O resto de vehículos gárdanse en prazas reservadas para uso do concello.

2/ ¿A exclusión dos 180.00 euros do Saneamento de Caamaño vai supor algúun tipo de atraso na obra?

Non.

3/ ¿Van mirar porque se mellore o sistema de depuración da EDAR de Caamaño e Xuño?

Son os técnicos redactores do proxecto os que valoran cal é o mellor sistema de depuración en cada caso.

Non temos a menor dúbida do criterio técnico e do sistema de depuración escollido, dado que o mesmo conta con tódolos informes favorables.

a) D. José Ángel Lorenzo Vila fai os seguintes rogos e preguntas:

1/ ¿Ademais do cambio de madeiras, váiselle dar un tratamento á pasarela da praia da Aguieira para contrarrestar a súa deterioración?

2/ Coñece a dous irmáns de idade avanzada que precisan do servizo de axuda no fogar ¿é posible concederelles esa axuda?

O Sr. Alcalde- Presidente contesta que non lle parece que o Pleno sexa o lugar axeitado para a pregunta que acaba de facer, e insta ao Sr. Lorenzo Vila a que fale coa Sra. Concelleira de Servizos Sociais para que un técnico do concello estude o caso.

b) D^a. María Ánxela Franco Pouso fai os seguintes rogos e preguntas:

D^a. María Ánxela Franco Pouso dille ao Sr. Deán Pouso que non se entende o que non se quere entender ou non se quere respostar e que el saberá se as obras que se incluíron no Plan da Deputación e se adjudicaron ao día seguinte na prensa ou se anunciaron na prensa tiñan ou non as autorizacións requiridas.

Intervén D^a. María José Maneiro Quintáns para preguntar cales foron as obras adjudicadas na prensa para poder contestar.

A Sra. Franco Pouso ínstaa a que repase os xornais para saber a que obras se refire, e di que lle contesten se queren e, senón, sigan coa súa manipulación.

De seguido, fai os seguintes rogos e preguntas:

1/ ¿A que atende que a delegación que fixo a Alcaldía delegue na Xunta de Goberno Local e que se publicou no BOP do 18 de abril? Ata o de agora non se actuou dese xeito e estránanllese esos cambios de conduta tan repentinos.

2/ Nas obras de 200 e pico mil euros de investimentos para mellora de camiños que o goberno municipal anunciou na prensa, ¿inclúese algunha pista que sexa competencia da concentración



parcelaria, como a do Outeiro de Beneso, na que o Sr. Alcalde lle dixo aos veciños que o concello xa se encargaba das obras?

3/ ¿Que saben do coche do concello, cun remolque, que foi depositando rodas usadas nos colectores de Loreto e da pista de Agrelo fai, aproximadamente 2 semanas, aproximadamente ás 9 da noite?

5/ ¿Que acontece cos vertidos do Outeiro Baixo? ¿Que acontece co vertido existente fronte ao bar "Caribe"?

6/ ¿Debe entender, despois de 4 anos, que se deu un informe favorable para que a empresa que elaborou o Inventario de Bens cobrase 18.000 euros da Deputación da Coruña e ese traballo non ten validez? ¿Como lle chaman a iso con 5 dedicacións?

7/ Din que o Inventario de Bens non contempla os camiños, pero supón que cando se dá licenza para ocupar a vía pública é porque esa vía figura no Inventario. ¿Desde cando os camiños municipais non forman parte do Inventario de Bens do concello? Cando se fai un bacheo nun camiño, ¿como saben que non están facendo un bacheo nun camiño privado? Vaian mirando o que pasa con ese inventario.

8/ ¿Teñen pensado gravar as sesións plenarias e retransmitillas como se fai en Muros ou Lousame para que os veciños que non poden vir ás sesións coñezan quen é cada quen?

O Sr. Alcalde- Presidente di que xa se están gravando e, ademais, tamén os gravan os concelleiros dos grupos da oposición.

9/ A radio de Porto do Son, que se atopa nunha situación ilegal, presta un servizo público, polo que debería retransmitir as sesións. Ademais, se é municipal todos os grupos políticos terán dereito a intervir, ¿non?

10/ Como van tanto polas parroquias, ¿informaron aos veciños do "sopapo" de 60 euros da Axencia Tributaria?

11/ ¿Como é posible que no Colexio de Caamaño sigan sen poder enchufar os ordenadores e unha estufa á vez cando fai frío porque saltan os machetes? Insta aos concelleiros do goberno municipal a que vaian polo colexio xa que se ten aos nenos pasando frío durante todo o curso.

12/ ¿Que está previsto facer na Relación de Postos de Traballo cos falsos autónomos que teñen agochados?

13/ O Sr. Alcalde- Presidente dixo na prensa que unha das cousas que contemplaba era a instalación dun hotel no "Chilango", antes "Residencia México". ¿Teñen dobre moral? Dun lado solicítanlle a Costas que retire o campo de fútbol de Xuño e o colextio de Portosín para deixar esa franxa de praia a disposición da xente e doutro queren que nunha praia con tanta afluencia de xente se permita facer un hotel. ¿Vaise autorizar un hotel nese emprazamento?

14/ ¿Que acontece para que a empresa "R" só busque clientes e só afronta o uso e a sinal nas rúas que xa están amañadas? ¿Só busca a ganancia, pois supón que nesas rúas o concello xa instalou as canalizacións e a empresa unicamente pasará a tubaxe? ¿Hai veciños de "última xeración", que deben ser os da aldea e, entre os do casco urbano uns que son "selectos" e outros "menos selectos"? A mellor cobertura, con diferenza, é a que dá o "dron" para encher o peto.

15/ ¿Ten o concello unha ordenanza para lavar coches na vía pública? ¿Por que non se cumpre? Se hai un veciño ao que de xeito continuado, e por ser vello, se lle lava un coche á porta da casa de xeito continuado e hai unha ordenanza que non se cumpre, o goberno municipal non ten vergoña.

16/ ¿A que se destinaron os ingresos do parque eólico dos anos 2014, 2015 e 2016 que suman un total de 77.132,60 euros? ¿É certo que acadaron un compromiso coa parroquia de Xuño de empregar parte deses ingresos nesa parroquia? ¿Que acontece co resto de parroquias? Roga que se invistan no monte.

17/ Roga que coa documentación do Pleno se remitan por correo electrónico os decretos da Alcaldía, como se fai noutros concellos, pois resulta imposible revisar máis de 100 decretos en cada Pleno.

O Sr. Alcalde- Presidente contesta que non é posible remitirlle os decretos por correo electrónico pois resulta imposible escanealos todos.

A Sra. Franco Pouso di que non é necesario escanealos, pois poden remitirlos en formato "word".

O Sr. Alcalde- Presidente responde que estudarán o tema e a Sra. Franco Pouso di que iso significa que non van remitirlos.

Continúa o Sr. Alcalde- Presidente pedíndolle á Sra. Franco Pouso que deixe de fixarse tanto neles pense nela mesma, e pregúntalle se sabe dun coche tirado nunha finca que denunciou a Policía Autonómica.

Continúa pedíndolle que pense nos outros colexios e non só no de Caamaño e pregúntase se só vale a opinión dunha nai que ten alí un neno; en relación coa construcción dun hotel, aclara que só dixo na prensa que había un empresario que quería facer un hotel e que se é autorizable ou non o dirán os técnicos. En relación coa dotación dunha rede de banda larga, di que é unha sorte que se implante, que ten que comezar por algún lado e que chegará a todos os veciños, aínda que á voceira do BNG lle pese.

c) D. David Barrio Alonso fai os seguintes rogos e preguntas:

1/ ¿Onde están as fontes que se retiraron da Alameda e da Rúa da Roda?

2/ ¿Por que se instalaron uns resalte en Miñortos para baixar a velocidade dos vehículos, pois non semella que se trate dunha demanda veciñal nin tampouco haxa unha elevada sinistralidade? Engade que o Regulamento de circulación dispón que eses resalte deberían estar sinalizados.

3/ ¿Tense pensado repor as táboas rotas e deterioradas da pasarela de madeira das Furnas antes do verán?

E non habendo máis asuntos que tratar, de orde da Alcaldía- Presidencia, levántase a sesión, sendo as **21:50 horas** do día **10 de maio de 2018**, de todo o que se estende a presente acta, da que eu, como secretario dou fe.

O ALCALDE- PRESIDENTE.

Asdo. José Luis Oujo Pouso.

O SECRETARIO, que dá fe.

Asdo. José Manuel González García.

